



SYNOD Newsletter

Volume XXVI

No. 347

E-mail : synodnews@gmail.com

AUGUST, 2012

SYNOD MISSION BOARD RAWNGBAWLNA CHANCHIN TLANGPUI

Mizo Kristian hmasate khan an rilruah ringlote veina nasa tak an nei nghal a, hei vang hian ram thenawmah kalin Chanchin Tha meichher chu an chhi darh tan nghal a. Kum 1910-ah Mizo tlangval pathum - Vanzika, Savawma leh Thangchhingpua te chuan Manipur rama Senvawn lamah Chanchin Tha an hril tan a. Kum 1911-ah Hrangvunga, Bungmun khua chu Tripura rama Chanchin Tha hril turin a thawk thla ve baw a. Kum 1913-ah Rev. Thianga chu Halflong lamah Chanchin Tha hril turin a pem thla ve ta baw a. Kum 1913-ah vek hian Mission Veng Upa, R. Dala chu Manipur rama Chanchin Tha hril turin a thawk chhuak baw a. Hetianga Mission hna kalpui a nih tak zel avang hian Mizoram Synod hnuaiah Kohhran leh Mission hna enkawltu tur Committee siam a ni ta a.

Kum 1953 khan Mission hna bik enkawl turin Synod Mission Committee (SMC) chu din a ta a. SMC hian kum 1949-ah volunteer-in Evangelist pathum - Thangzawna, Ronghinglova leh Lalhleia te chu Bru (Tuikuk) zinga Chanchin Tha hril turin an tir tan a. Kum 1959-ah Rev. Lalthanga chu Burma (tunah Myanmar) ramah Missionary turin tirh a ni leh a; hei hi tuna Myanmar Presbyterian Church lo din chhuahna bul hi a ni. Kum 1961-ah Synod Mission Committee chu Synod Mission Board (SMB) tia thlak a ni ta a, SMB hian 1968-ah Assam state-a Cachar district-ah leh Karbi Anglong-ah missionary a tir a. A remchan dan angin Mission Field hawn belh a ni ta zel a.

1. Mission Field hrang hrang dinmun (a, b, c indawtin)

(1) **Arunachal East:** Kum 1991-ah Mission Field hawn a ni a, tunah hian Kohhran member 4,598 awm tawhin Kohhran 18, Preaching Station 20 a awm a, Pastor Bial paliah then a ni a. School pathum, Medical Centre paruk leh Craft Centre pakhat neiin Field Secretary hovin thawktu (missionary) 118 an bung mek. Nikum October atanga kumin June inkarah ringthar 147 an awm.

(2) **Arunachal West:** Kum 2001-ah hawn a ni a, tunah hian Kohhran member 5,058 awm tawhin Kohhran 40, Preaching Station 41 a awm a, Pastor Bial pariatah then niin School pali, Medical Centre pasarih leh Craft Centre pakhat a awm a, Field Secretary hovin thawktu (missionary) 141 an awm. Nikum October atanga kumin June inkarah ringthar 231 an awm.

(3) **Assam:** Kum 2008-ah hawn a ni a, tunah hian Kohhran member 675 awm tawhin Kohhran 18, Preaching Station pali leh Fellowship 18 a awm a, Pastor Bial pahnihah then a ni. School pakhat leh Medical Centre pathum neiin Field Secretary hovin thawktu (missionary) 86 an awm a; nikum October atanga kumin June inkarah ringthar 140 an awm.

(4) **Barak Area:** Kum 1975-ah hawn a ni a, tunah hian Kohhran member 6,752 awm tawhin Kohhran 42, Preaching Station 49 leh Fellowship 32 a awm a, Pastor Bial pakuaah then a ni. School pathum, Medical Centre paruk leh Craft Centre pahnih neiin Field Secretary hovin thawktu (missionary) 153 an awm a; nikum October atanga kumin June inkarah ringthar 61 an awm.

(5) **Delhi:** Kum 1998-ah hawn a ni a, tunah hian Kohhran member 975 awm tawhin Fellowship 17 a awm a, Pastor Bial pahnihah then a ni. Medical Centre pahnih leh Craft Centre pakhat neiin Field Secretary hovin thawktu (missionary) 32 an awm a; nikum October atanga kumin June inkarah ringthar 374 an awm.

(6) **Jharkhand:** Kum 2008-ah hawn a ni a, tunah hian Kohhran member 3,652 awm tawhin Fellowship 54 a awm a, Pastor Bial pathumah then a ni. School pakhat leh Medical Centre pathum leh Craft Centre pakhat neiin Field Secretary hovin thawktu (missionary) 84 an awm a; nikum October atanga kumin June inkarah ringthar 195 an awm.

(7) **Karbi Anglong:** Kum 1989-ah Mission Field hawn a ni a, tunah hian Kohhran member 5976 awm tawhin Kohhran 38, Preaching Station 34 a awm a, Pastor Bial pasarihah then a ni a. School pasarih, Medical Centre pariat leh Craft Centre pakhat neiin Field Secretary hovin thawktu (missionary) 209 an awm. Nikum October atanga kumin June inkarah ringthar 134 an awm.

(8) **Kolkata:** Kum 1988-ah Mission Field hawn a ni a, tunah hian Kohhran member 4,491 awm tawhin Fellowship 64 a awm a, Pastor Bial paliah then a ni a. Medical Centre pahnih leh Craft Centre pahnih neiin Field Secretary hovin thawktu (missionary) 95 an awm. Nikum October atanga kumin June inkarah ringthar 232 an awm.

(9) **Lucknow:** Kum 1999-ah Mission Field hawn a ni a, tunah hian Kohhran member 6,316 awm tawhin Preaching Station 80 a awm a, Pastor Bial pangaah then a ni a. Medical Centre pathum neiin Field Secretary hovin thawktu (missionary) 54 an awm. Nikum October atanga kumin June inkarah ringthar 132 an awm.

(10) **Nepal:** Kum 2000-ah Mission Field hawn a ni a, tunah hian Kohhran member 2,317 awm tawhin Kohhran paruk leh Fellowship 46 a awm a, Pastor Bial parukah then a ni a. Medical Centre pariat leh Craft Centre pahnih neiin Field Secretary hovin thawktu (missionary) 72 an awm. Nikum October atanga kumin June inkarah ringthar 152 an awm.

(11) **Patna:** Kum 1999-ah Mission Field hawn a ni a, tunah hian Kohhran member 726 awm tawhin Preaching Station 16 a awm a, Pastor Bial pahnihah then a ni a. Medical Centre leh Craft Centre pakhat ve ve neiin Field Secretary hovin thawktu (missionary) 49 an awm. Nikum October atanga kumin June inkarah ringthar 90 an awm.

(12) **Siliguri:** Kum 1988-ah Mission Field hawn a ni a, tunah hian Kohhran member 1,306 awm tawhin Preaching Station 28 a awm a, Pastor Bial paliah then a ni a. Medical Centre pathum leh Craft Centre pakhat neiin Field Secretary hovin thawktu (missionary) 42 an awm. Nikum October atanga kumin June inkarah ringthar 103 an awm.

(13) **Tripura:** Kum 1986-ah Mission Field hawn a ni a, tunah hian Kohhran member 17,648 awm tawhin Kohhran 86 leh Preaching Station

Phek 2-na ding lamah chhunzawm a ni

SYNOD Newsletter

EDITORIAL STAFF

Rev. K. Lalpiangthara (LPT)
Rev. B. Lalngkhakliana (BLNG)
Upa H. Ronghaka (HR)
Upa C.H. Thangkhuma (CTK)

Editorial.....

KOHRAN DIN CHHAN

Kum 1972 Synod Inkhawmpuiin a rel angin August 31 hi Ramthar Ni atan Mizoram Presbyterian Kohhran chuan kan hmanng chho ta zel a. 'Ramthar Ni' leh 'Chanchin Tha thlen Ni' kan han hmanng thinte hian Chanchin Tha hril kan ngaih pawimawhzia a tilang thei awm e. Kohhran a din chhan hi thil dang ni lovin, Chanchin Tha hril turin a ni a. "He lungpui chungah hian ka kohhranho ka rem chho ang a, Mitthi Khaw kulh kawngkharte chuan chu chu an ngam lo vang," tia kan Lal Isuan a sawi zawh chiaha a sawi chu Vanram chabi kawltu chu kohhranhote kan nih thu a ni.

Bonhoeffer-a chuan, "Kohhran hian Chanchin Tha a hril chiah hian Kohhran tia vuah tlak a lo ni thin," a ti a. Kohhranin hma kan lakna tam tak hi chu ringlote leh sawrkar pawhin a thawh theihte a ni a. Chanchin Tha hril kher hi chu Setana thik tham hna bik a ni a, kan ngaih pawimawh deuh deuh pawh a tha awm e. A. Richardson-a chuan, "Chanchin Tha puan darh hnaa neih lo kohhran chu Ramthar Field a ni nghal a ni," a ti hial a ni. Chanchin Tha hril ngai pawimawh kohhran chu a nun pawh an nung deuh nge nge a, an luan chhuah zelna chuan an kohhran nun pawh a tithianglim bawh thin. Kan din chhan 'Chanchin Tha hrilah' kohhrante kan chian phawt chuan kan ram tan pawh damna a ni dawn a ni.

ATC-ATANGA BD EXAM-TE AN PASS VEK

July 2012 tawp lamah khan Serampore College University hnuaia Bachelor of Divinity (BD) Results 2012 tihchhuah a ni a, Aizawl Theological College (ATC) atanga exam beitu 34 an pass kim vek a. An zingah hian NI Lalmuanpuii Hmar chuan A- hmuin First Division-a tling awm chhun a ni.

Exam beitude pass dan chu hetiang a ni:

First Division Grade : 1 A-
Second Division : 31 (B+ 7, B 17, B- 7)
Third Division : 2 C+ 1, C 1

Tuna zir mek BD II yr. leh III yr. results pawh tihchhuah tawh a ni a, zirlai zawng zawngin an passed vek bawh a ni.

Phek 1-naa mi zawmna..

166 a awm a, Pastor Bial 16-ah then a ni. School paruk, Medical Centre 11 leh Craft Centre pathum neiin Field Secretary hovin thawktu (missionary) 234 an awm. Nikum October atanga kumin June inkarah ringthar 882 an awm.

(14) Home Mission North: Kum 1949-ah Mizoram chhunga Ramthar rawngbawlna hi tan a ni a, tunah hian HM North huam chhungah Kohhran member 9,897 awm tawhin Kohhran pasarih leh Preaching Station 12 a awm a, School pariat leh Medical Centre pasarih awmin SMB hmunpui atanga enkawl a ni. Thawktu (missionary) 159 an awm. Nikum October atanga kumin June inkarah ringthar 110 an awm.

(15) Home Mission South: Kum 1987-ah tan a ni a, tunah hian HM South huam chhungah Kohhran member 7,578 awm tawhin Kohhran 43 leh Preaching Station 24 a awm a, School 18 leh Medical Centre pakua awmin Administrative Secretary, Chhim Bial enkawl a hnuaia a awm. Thawktu (missionary) 189 an awm. Nikum October atanga kumin June inkarah ringthar 296 an awm.

(16) Cachar Tlang: Kum 2009 atangin SMB hnuaia an awm a, tunah hian Kohhran member 2,318 awm tawhin Kohhran 45 leh Preaching Station pakua a awm a, Pastor Bial paliah then a ni. School leh Medical Centre paruk ve ve awmin SMB hmunpui atanga enkawl a ni a, thawktu (missionary) 90 an awm. Nikum October atanga kumin June inkarah ringthar 107 an awm.

(17) Masihi Sangati: Hei hi Mission Field ang ni lo mah se Ramthar rawngbawlna hnuaia awm a ni a, 1979-ah he rawngbawlna hi tan niin tunah Fellowship 212 an awm a, Area 18-ah leh Pastor Bial li-ah then niin Director hovin thawktu 136 an awm. October 2011 - June 2012 chhungin ringthar 454 an awm.

(18) Manipur: Kum 1967-a hawn chu kumin 2012 atang hian anmahnia inenkawl thei tawha ngaih an nih avangin chhuahsan a ni a; amaherawhchu, Office Assistant 1-in Office a la enkawl a ni. Nikum Oct - December chhung khan ringthar 47 an nei.

(19) Mission danga thawk: Tunah hian 53 an awm mek a; training bei mek 10 an awm bawh.

(20) Thawh dangte: Hqrs. Office-ah 24; Hindi Bible School-ah panga; Missionary Training College-ah 12; MDTC, Bualpui 'N'-ah pariat; Ramthar Hostel-ah pakhat leh Masihi Sangati Kendra Office-ah pathum, an vaiin 53 an awm bawh.

SMB hnuaia thawktu awm zat hi hetiang hian a khaikhawm theih -

(a) Missionary (SMB hnuaia)	-	607
(b) Field Worker (A ram mi)	-	721
(c) Contract Missionary	-	675
(d) Hqrs. Office, Trainees, PHBS etc.	-	53
Total	-	2056

2. Kohhran dinhmun: Mission Field-a Kohhran lama kan dinhmun tlangpui hetiang hi a ni -

1) Pastor Bial zat	-	86
2) Kohhran zat	-	343
3) Branch Church zat	-	483
4) Fellowship zat	-	231
5) Kohhran member zat	-	71375
6) Kohhran Upa zat	-	514
7) Presbytery zat	-	7

(Tripura 2, Cachar Tlang 1, Barak Area 1, Karbi Anglong 1)

Note - Kan inchhiarna hi thenkhatah nikum 2011 aia a hniamna a awm nual a, hei hi Manipur Field kan chhuahsan tak vang a ni.

3. Mission dang nen thawhhona: Tunah hian Mission/pawl dang 15 nen thawk hovin, thawktu 54 chuang kan tir mek bawh a ni. Kan thawhpui pawlte chu -

- 1) Emmanuel Hospital Association, Delhi (1980) - (Thawktu 1 kan tir mek)
- 2) Interserve (India) (1985) - (Thawktu 2 kan tir mek)
- 3) Friends Missionary Prayer Band (1988)
- 4) CONCERN (1988)
- 5) Evangelical Presbyterian Church, Sikkim (1988)
- 6) India Missions Association (2000) - (Thawktu 1 kan tir mek)
- 7) Youth With A Mission North East India (2004)
- 8) Christian Reformed World Mission (2005) - (Thawktu 4 kan tir mek)
- 9) Operation Mobilisation (2005)
- 10) Church Mission Society (2006) - (Thawktu 9 kan tir mek)
- 11) Seva Bharat (2008) - (Thawktu 7 kan tir mek)
- 12) New Enterprises International (2008) - (Thawktu 1 kan tir mek)
- 13) SIMNEI (2008)
- 14) Darjeeling Hills Bible School (2008)
- 15) Amritsar Diocese, CNI (2011 atangin)
- 16) Council for World Mission (1986) (PCI kaltlangin Missionary 15 kan tir mek)

4. Sum dinhmun : Ramthar rawngbawlna nana kum 2010-2011 sum hmuh chu ₹ 319,628,025/- zet a ni a. Kum 2011-'12 budget chu ₹ 37,36,56,700/- a ni. Hei hi Synod budget 36.57% a ni.

5. SMB Hmalakna thar langsar zualte

1) Orissa state-ah: Synod Mission Board chuan India rama Kristian tihduhdah hluarna ber hmun zinga mi, Orissa state lamah thuk zawka rawngbawlna turin a inpuahchah chho mek zel a. Kum 2011 kum tirah atang hian Dr. K.C. Lalchhingzova, Bawngkawn chu Orissa-ah hian

Phek 3-na ding lamah chhunzawm a ni



Thla-in ârkai a den zân takin an kohhrana rawngbawltute chu ralvên bûk lam panin an kal dam dam a. An va thlena thuthmunte an han rem fel hnu chuan, an zinga phanchang deuh ber chuan, “Râl Vêngtu, inggaitlawm dan min zirtir rawh,” a ti chhuak ta phawng mai a. Râl Vêngtu chuan, “Tlang chhip kawng tê tak têah hian beram pachal leh beram no an intawk a, kawng a zim êm avangin a tu ve ve tan pawh inelhna tur a awm chuang lo va. Beram pachal chuan, ‘Ka baw ang a, ka chungah i kal phei dawn nia’ a ti a, tichuan a baw a, a kaltir ta a. An duhna lamah ve veah awlsam takin an kal thei ta mai a.

“Mahni aia mi dang dah pawimawh hmasak hi rawngbawltu tih tur a ni tih hria ula. A tul phawt chuan beram pachal ang khan hnuaihnun zawk pawh ngam ula, chutianga in tih theih chuan harsatna tur nia in hriatah pawh engkim a fel duak duak zel mai ang. Ringtu nun chu a hnuaihnun ngam apiang sanna a ni a. Lal Isua pawh a tlawmna tawp kraws khan vawiin thlengin mi rothap tak tak te pawh an mittui a surtir thin a ni. Thiam zawk thiam lo zâwka in lan ngam naah te, chak zawk tlâwm zâwka in lan ngam naah te, huai zawk dawih zâwka in lan ngam naah te leh hre zâwk hre lo zâwka in lan ngam naah apiang hnehna puanzar in thing pharh zel dawn alawm!

Rawngbawltu tana pawimawh tak chu intihtê ngam hi a ni a, kohhran indan leh Bial then chungchang pawh hian mipui lam aiin rawngbawltuteah hian mutân a awm zawk zelemaw tih tur a ni thin. Khawi hmunah pawh rawngbawltu an tlawm ngam naah apiang an beramten hamthatna an hmu thin. Lal Isuan, “Tupawh inggaitlawm apiang an tlawm ang a, tupawh inggaitlawm apiang chawimawiin an awm ang,” a tih kha hre reng an che u,” a ti a. Hlawk inti takin thla eng tak hnuaiah chuan an thin ta dam dam a.

MOTOR ACCIDENT-A THI LEH HLIAMTE A RAL

July 21 (Inrinni)-a Zokhawthar atanga Aizawl pan night bus, MZ-01 E-7105 (ZK Travels) Keifang daia quarry chimin a hnawla thite leh a hnu August 3-a Bung Bangla bula lei minin Taxi a hnawla thite chu Mizoram Presbyterian Kohhran Synod chuan ₹ 10,000/- in a ral a; Bus accident-a thi zinga mi pali, state pawn lam mi leh an address hriat chian mai theih lohte erawh chu ralna pek an ni lo thung. Bus leh Taxi chesuala hliam tuarte hnenah pawh chhawmdawlina ₹ 3,000/- theuh pek an ni.

ZAWHNA leh CHHANNA

Zawhna : *Kan Kohhran Presbyterian hian inkaihhruaina dan buah emaw, Synod-in emaw, kan kohhran mi (Hmeichhia) kohhran danga pasal nei turte hi, bialtu Upa emawin kohhran hminga thlahna tawngtai neihsak hi phal loh em ni? Ringtute chu kohhran dang an ni emaw ringlo mi pawh ni se, thlahna tawngtai a ni emaw, tawngtaisak te chu kan tih tur a ni dawn lawm ni?*

- R Lalparthanga, Bawktlang

Chhanna : A ni emaw, i tawn hriat ngei i rawn zawt a nih hmel a. Nupa chungchang dan kan hman mekah leh kan PCI dan bu lamah tawngtaia inthlah khapna lam a lang lo va. ‘Nupa chungchang dan leh Kohhran pawl dang nena kan inkungkaihna dan’ SEC-in a pawm thar ber Bung I:vii G-ah chuan ‘Inneih lawmpui theih loh te’ tihah chuan hetiang hian ziaak a ni:

(i) **Lawmpui theihthe:** Eng kohhran pawl mi pawh ni se, an Kohhran dana inneihtirtu hmaa kan Pathian hming chhala inneite chu, a duh chuan lawmpui theih a ni.

(ii) **Lawmpui theih lohte:** Khawvel dana innei, inneihtirtu pawh awm lo leh Pathian hming chhala innei pawh ni lo, insawi rema, man leh mual inhlâna, inneih ti zo ta maite hi lawmpui theih an ni lo, tiin.

Engpawh ni se, kan dan bu lamah tawngtai phal loh lama sawi awm chiah lo mah se, khawvel dana innei tur ang chi tawngtaia lo thlah awm ta se, Bialtu Upa tân pawh dem lêt hlawh theihna a ni ve thei mai thei baw. In tawngtaisak avanga inthunun erawh chu tuman an taw lo mai thei a. Rawngbawltute tan chuan fimkhur hi a him ber fo tih hriat a tha.

SAWMNA

SAIHA PRESBYTERIAN KOHHRAN Biak In thar chu September 15, 2012 (Inrinni) khian hawn a ni dawn a. Saiha Kohhrana lo lawi tawh zawng zawngte he hun hmanpui tur hian an sawm. Kal thei lote pawh tawngtaia lo tanpui turin an ngen baw e.

KELKANG KOHHRAN chuan September 20-23, 2012 chhung khian Kelkang Kohhran Centenary leh Platinum Jubilee lawm kan tum a. Kelkang Kohhrana lo lawi tawh zawng zawngte leh Kelkang khaw chhuak zawng zawngte chu he hun hmanpui tur hian an sawm.

SAILUTAR KOHHRAN chuan October 4-7, 2012 chhung khian Tengtawng - Sailutar kum 100-na (Centenary) lawm an tum a. He hun min hmanpui tur hian Sailutar Kohhrana lo lawi tawh zawng leh Sailutar khaw chhuak zawng zangte an sawm.

Phek 2-na ding lama mi zawmna...

rawngbawl turin Synod Mission Board chuan a tir a; ani hi Moorshead Memorial Christian Hospital nen thawk dun tura tir a ni. Hei bakah hian kumin 2012 hian Dr. Lalsangpuii leh a pasal Pu Albert Kawldingiana, M.Th. Evangelist; Dr. Ramdinmawii, leh Pi Zonunmawii Khiangte S/N (w/o Dr. K.C. Lalhgingzova) leh Pastor Lalhmachhuana Ralte te chu Board chuan a tul ang zela hma la turin a tir leh ta a ni.

2) Cambodia lamah: Cambodia ramah hian Synod Mission Board hnuaia Tent-Maker missionary pathum leh missionary Nl. Lalrinawmi Ralte te an bung mek a. Hei bakah hian nasa zawka rawngbawltumna avangin a tul anga lo thlithlai hmasa turin Board chuan kumin (2011) kum tir lam khan Rev. Lalzuithanga, Executive Secretary, i/c Mission chu Cambodia ramah hian a lo tir tawh a, Thailand rama retreat hman pahin Rev. Lalhchuanmawia pawhin rawngbawl dan tur a han thlithlai tawh baw a, SMB anga kan rawngbawl theih dan tur kawng zau tak inhawng a awm a ni. Kumin 2012 June ni 15 khan Rev. Sairenguia Sailo pawhin tluang takin Cambodia hi a thleng chho tawh baw.

6. Ramthar Chanchinbu: Ramthar Chanchinbu hi kum 1984 atanga chhuah tan a ni a. August 2012-ah bu 24,800 chhut a ni a, bu 24,700 thawnchhuah a ni.

7. Thawktu chawm: Missionary pakhat ₹ 1,000/- hisapa chawmna kalpui chu India ram pawn atang pawhin dawn a ni a. A tam ber erawh chu Mizorama Kohhranhote atanga dawn a ni. Ram pawn atanga chawmtute chu Malaysia Mizo Christian Fellowship, Singapore Mizo Christian Fellowship, Des Moines Mizo Christian Fellowship, USA atang tein a ni. Mizo te hi khawiah pawh awm ila, Pathian rawngbawl hna kan ngaipawimawh thin hi a lawmawm tak zet a ni.

August 2012 thlenga Missionary chawm zat leh chawmtu zat chu hetiang hi a ni:

1) Missionary chawm zat	- 11,287
2) Chawmtu Kohhran zat	- 561
3) Chawmtu Bial KTP zat	- 121
4) Chawmtu Bial Koh. Hmeichhia zat	- 112
5) Chawmtu Bial zat	- 74

Thu lakna: Secretary, Synod Mission Board

PRESBYTERIAN HOSPITAL HRIATTIRNA

1. Damdawi in leh a chhehvel-ah meizuk khap a ni.
2. Damdawi in Compound-ah Motor/Bike chak taka tlan leh engine bengchheng chi hman khap a ni.
3. Chawlhni (Sunday)-a damlo kan intlawh nasat deuh hian damlo chau zualten an chauh zual phah thin avangin tlawh dan pawh i thiam deuh ang u.
4. Damdawi ina damlo tlawhtuten Gate duty-te tu awih lova pal tlang luih tum, dan bawchhiate avangin Damdawi in a buai phah thin. Tu man Gate duty-te su lui lo turin kan ngen e.

Sd/-Director
Presbyterian Hospital



CHHINGCHHIP VENGLAI KOHHRAN chuan June 4-27, 2012 chung khan Pu R. Lalrinsanga, Speaker, Gospel Deliverer Team ruaiin Camping chhawng thum leh naupang Lâng camp wavi hnih an buatsaih a, Camping pangngaiha campers 155 lut a. Chhandamna/Siamthar lehna changin an hlim hle. Zu hmun sa hmuna tâl thinten Pathian Thlarau pawlna an chang thar a, zu hmun pawh a reh rawih mai.

HMUNTHA KOHHRAN chuan ni May 26 - June 10, 2012 chungin Tv. C. Zairemmawia (Dinhtarlehna Team) Speaker-a hmangin, Camping & Crusade an buatsaih a. Biak In a Inkhawm ngai lo tawh lo eng emaw zatin Pathian biak inkhawm an ngai pawimawh thar a. Lâh hlimna bakah Pathian thu, a taka nunpui pawimawhzia thuchah sawi thin chuan mi rilru a hneh a; Kohhran boruak a hlimawm hle.

BUNGTLANG VENGSAK KOHHRAN chuan July 18 - 23, 2012 chung khan Pu Laltindawla Speaker-a hmangin Crusade hlawhtling tak an buatsaih a, July 21 (Inrinni)-ah thalai leh naupang pual Lâng camp an buatsaih baw. July 23, 2012 khan awmni khamin hun an hmang a. Thlarau Thianghlim hnathawh leh pawl tharna chang eng emaw zat an awm avangin Kohhranhoten lawmawm an ti a, Kohhran pawl dang atangin Crusade chhimtu an awm reng baw.

BAKTAWNG VENGLUN KOHHRAN chuan July 21 - 31, 2012 chung khan Synod Revival Speaker Upa T.B.C. Rotluanga, Krista Bawite team ruaiin Crusade an buatsaih a. Kohhrana mi hlaten Krista siamtharna an chang a, Thlarau Thianghlim hnathawh avanga harh tharna chang eng emaw zat an awm baw a, Kohhranho an lawm hle.

KHAWRUHLIAN KOHHRAN chuan July 30 - August 5, 2012 chung khan Pu Laltindawla (Pathian Thuruk Enkawtu Team) ruaiin hun an hmang a. Naupang Lâng camp ni hnih chung buatsaih a ni baw. Team Member NI. Masthangin tawngtai tihdam rawngbawlna, ni tin leh zan inkhawm ban apiangin a nei baw a. Taksa leh thlarauvah damna chang an tamin Kohhranhoten Crusade avang hian Thlarau lam leh tisa lamah hlawkna nasa tak an dawng a. Inkhawm ngai loten Biak In an rawn pan a, Kohhran pawl dang atangin chhimtu mi thahnem tak an awm baw.

VAIVAKAWN KOHHRAN atanga siam Vaivakawn Vengthlang Branch Church chu August 1, 2012 (Nilaini) zan khan Bialtu Pastor B. Lalngaklian a hawng. Hawna inkhawm hi Bial Chairman Upa J.H. Rothuaman kaihuaiin Bial Secretary Upa Lalmuankiman Branch Church hruiatu tura ruatte leh Branch Church dinhmun a puang baw. He Branch Church hi Vaivakawn atanga Luangmual leh Mizoram University kawngpui lama awm a ni a; Vaivakawn - Luangmual kawngpui atanga Ropaibawka chhuak kawngpui pên tantirhaah Vaivakawn Kohhran Biak In atan mi mal in sak sa cheng nuai 48-a leiin a chei nan cheng nuai 10 vel a sen leh hnuah he Branch Church hi hawn a ni a. Biak In hmun lei nan hian Synod atangin 'Kohhran indanna' sum cheng nuai 15 lai an dawng a, kohhranho an lawm hle. Vaivakawn Vengthlang Branch Church-ah hian chungkua 128 an awm a, Kohhran member 582 awmin danzawhkim 412 an awm. Vaivakawn Kohhran atang hian Kohhran pathum - Zotlang, Kanan leh Hunthar te an lo indang tawh a, a palina tur Vaivakawn Vengthlang Branch Church hawn a ni leh ta a. Pathianin kohhran thar pian zelna hmanruaa a hman avangin kohhranhoten lawmawm an ti hle.

SYNOD REVIVAL BEIHPUI

Synod Revival Committee chuan Synod Executive Committee remtihpuinain a hnuai tar lan ang hian Revival Beihpui thlak dan tur ruahmanna a siam a, he beihpui hi a hlawhtlin theih nan mahni hmun theuhvah thahnem ngai taka tawngtaia tan lo la theuh turin Kohhranhote beisei an ni.

Kumin October 15-21, 2012 (Thawhtanni atanga Pathianni zan) chungin District Headquarters-a Pastor Bial 19-ah leh thingtlang Kohhran lian zual deuh deuhva Bial 51-ah Revival Beihpui thlak a ni ang a. Ruahmanna fel tak an lo siam lawk theihna turin a neihna tur Bial Secretary theuhvah lehkhaw pawh thawn chhuah tawh a ni a. He Beihpui thupui atan - **'Ram chu LALPA ta a ni'** (Sam 22:28) tih thlan a ni. Hun hman dan tur tlangpui leh hriat turte hetiang a ni -

1. Ni 15 (Thawhtanni) zana tan remchang lote tan Thawhle zana tan mai tur a ni.
2. Bial khat tan Speaker pakhat zel tirh tum a ni a, Bial Standing Committee-in an Bial chhunga an rawngbawl dan tur chu an lo ruahman ang.
3. October 20, 2012 Inrinni chhunah Pastor thuthmun (Station)-ah Bial huap tawngtai beihpui neih tura ruahman a ni a. Inrinni zan atangin hmun khatah Bial huap Crusade hman chhunzawm tur a ni ang. A hmun chu Bial Standing Committee-in a ruat ang.
4. Bial Speaker tirhte ruai zui duh chuan Speaker-te remchan dan azirin rawih zui theih a ni ang.
5. October 26, 2012 (Zirtawpni) zana Aizawl khawpua Pastor Bial 34-ah Beihpui thlak tum a ni baw a. A tûk, ni 27 Inrinni hian A.R. Ground-ah Tawngtai Beihpui neih tum a ni baw. Bial Secretary tinte hnenah lehkhaw pawh thawn chhuah vek a ni a. October 27, 2012 Inrinni zan atangin Bial huapin hmun khatah Beihpui thlak chhunzawm theih ni se, Bial tina Speaker kalte hi hman zui remchang chu hman zui mai tur a ni ang.

- *Thu lakna: Rev. R. Lalchangeliana, Director, Synod Revival*


NGENNA


Kohhran/Bial leh SL&PB kan indawr tawnaah phone-a han inzawh zui duhte a awm thin a. Contact No. lehkhaw rawn ziaak tel zel turin kan inngen a. Kohhran leh Bial Letter Head siam turte pawhin Secretary tang laite phone tar lan zel theih ni se a tha khawp ang.

- Editor, SL&PB

PRESS RELEASE

Mizoramin kawng hrang hranga hma a sawn mek laiin infiamna lamah pawh hma kan sawn ve zela, a lawmawm tak zet a ni. Infiamna lama hma kan sawnna hi a lawmawm em em rualin Kristian ram kan nih avangin kan ni serh pawimawh, Pathianni-ah infiamna leh intihlimna lam thil huaihawt lo tur leh, kan ni serh pawimawh hi min zahsak hram turin Mizoram Presbyterian chuan Mizoram cheng zawng zawngte a ngen a ni.


(UPAD.P. BIAKKHUMA)
Secretary
Mizoram Synod



(REV. THANGZAUVA)
Moderator
Mizoram Synod

FIMKHUR TURA NGENNA

P.C. Lalrinmawia s/o P. Lalsangliana (L) chuan Synod Revival Speaker ni thin leh Arunachal Pradesh-a missionary hna thawk tawh nia insawi rinawmin, pawl chhuak theology a vahpui thung a. Lal Isua thupek, Chanchin Tha hril chu nasa sawiselin, missionary phun kohhran hi kohhran dik a nih loh thu te, sakawlh hlauhawmzia leh chumi laka himna chu Kohhran chhuahsan a nih thute a sawi thin a. A thu sawi dan hi a him lo a ni tih hriain Champhai Kanan Kohhran Upate pawhin wavi eng emaw zat an zilh tawh a; mahse, a sawt lo va. Chuvangin, Kohhran Committee chuan Kohhrana tel zel tlakah ngai lovin June 16, 2012 khan Kohhran member nihna an hlihsak ta a ni. P.C. Lalrinmawia hi Synod Revival Speaker a ni lo va, Synod rawiha missionary pawh a ni hek lo.

Hetianga deuh baw hian **Pu Dâra (Dârthangpuia)** Sihphir khua nia inchhal pawhin sakawlh hlauhawmzia a vah vaihpui a, tihder tur zawngin Serchhip leh khawchhak tlangdung a fang vel baw a. Sihphir mite erawh chuan an khaw mi a nih loh thu an sawi thung. Amah ngei pawhin dawt a ni tih a hriat reng chu a zeldin leh mumang nen chhûn finin a sawi thin a ni ber mai!

Heng mite hian tihder leh bum theih nia an ngaihte chu bum an tum zel dawn a. Hetianga dawt leh thu belh chian dawl lo sawia mi tihchî-âi chingte lakah hian Kohhran mite fimkhur ila, Kohhran zirtirna ziktluakah hian i lungawi taw ang u.


(REV. VANLALZUATA)
Senior Executive Secretary
Mizoram Presbyterian Kohhran